

09/07/2003

KL bermandi cahaya laser

KUALA LUMPUR: Ibu negara akan bermandi cahaya laser selama 15 minit apabila sekurang-kurangnya 100 bangunan di tiga zon dipasang alat mengeluarkan cahaya itu sempena sambutan Hari Kemerdekaan ke-46 pada malam 30

Ogos depan.

Menteri di Jabatan Perdana Menteri, Datuk Tengku Adnan Tengku Mansor, berkata acara gilang-gemilang itu sebagai simbolik memberi penghormatan kepada jasa Perdana Menteri, Datuk Seri Dr Mahathir Mohamad.

Pada malam itu, Dr Mahathir dan Timbalan Perdana Menteri, Datuk Seri Abdullah Ahmad Badawi serta isteri masing-masing akan diterbangkan dari Putrajaya ke tempat sambutan di Kuala Lumpur menaiki helikopter.

"Acara bertema Kembara Bercahaya ini juga akan digunakan untuk menggambarkan liku-liku dan perjalanan pemimpin negara sepanjang 46 tahun

lalu. Ia akan mempamerkan pembangunan dan pencapaian negara sejak 1957," katanya pada sidang media mengenai pancaran khas di seluruh negara sempena

Sambutan Merdeka ke-46, di Dewan Bandaraya Kuala Lumpur (DBKL), di sini semalam.